

In cusseglier federal è grev-malsaun – co agir?

DA CLAUDIA CADRUVI / ANR

■ **Tge capita, sch'in minister n'è betg pli abel d'exequir l'uffizi? La chombra pitschna ha reglà ier la dumonda en la lescha parlamentara. Chanzeliera federala Corina Casanova ha accompagna la fatschenta.** L'entschatta da quest'emna è cusseglier federal *Hans-Rudolf Merz* anc stà en il coma e blers èn sa dumandads, tgi che stuess decider, sch'il minister da finanzas restass grev malsaun. En il fratemp n'è la dumonda per fortuna betg pli uschè actuala. Ma l'incap ha mussà ch'igl è bun sch'i dat reglas cleras. Quellas ha il cussegl naziunal gia discussiunà, ed ier ha era la chombra pitschna decidì.

Tgi dastga pretender la decisiun?

L'istanza responsabla fiss l'autorità ch'elegia il cussegl federal, pia l'assemblea federala. Lezza po far ina decleranza da «inabilitad d'uffizi» (Amtsunfähigkeit). Duas istanzas han il dretg da pretender ina tala decisiun. Quai fissan il biro da l'assemblea u il cussegl federal. Il

biro consista dals presidents, dals vices, dumbrauschs e presidents da fracziun da las duas chombras.

Sche ina da las duas istanzas pretendia ina decisiun davart ina inabilitad d'uffizi sto l'assemblea tractar la chausa sin il pli tard en la proxima sessiun. Sch'i vegn constatà ina inabilitad d'uffizi, daventa il sez vacant è vegn occupà cun ina elecziun sco usità.

Il cussegl federal less decider sez

Pertutgand il punct, tgi che dastga clamar ensem l'assemblea hai dà differents opiniuns. «Il cussegl federal s'incuntra mintg'emna, ils commembers s'encunuschan bain e stattan en stretg contact», ha ditg *Corina Casanova* en sia funcziun sco chanzeliera federala. «Uschia po il cussegl federal giuditgar bain, sch'i dess ina raschun per l'inabilitad d'uffizi. El è perquai da l'opiniun ch'i fiss meglier, che mo ina istanza fiss responsabla.» Cun quella istanza ha la chanzeliera manegia il cussegl federal.

Ma ina gronda maiorità da las duas chombras saja d'in'otra opiniun, ha Ca-

sanova constatà. Perquai na s'opponia il cussegl federal betg pli.

Cura è in cusseglier inabel?

Las premissas per ina inabilitad d'uffizi èn dadas, sche suandants puncts èn ademplids: Il cusseglier federal pertutgà stuess avair grevs problems da sanadad, esser evidentamain e per lung temp inabel d'exequir l'uffizi, ed el na pudess betg sez declerar a moda valaivla la demissiun, ha explitgà *Hansbeiri Inderkum* (pcd/UR).

Auters puncts dal dretg parlamentar augmentan oravant tut l'effizienz dal parlament. Uschia datti per exempel ina clausla da guillotina per intervenziuns ch'èn pli veglias che dus onns.

En in pitschen detagl n'è il cussegl dals chantuns betg d'accord cun la versiun dal cussegl naziunal. Lez aveva pretendì che dus u trais cussegliers possian inoltrar ensem ina iniziativa parlamentara. Il cussegl dals chantuns vul ch'ins restia tar il sistem usità che be in soli politicher po inoltrar talas intervenziuns. La lescha turna en la chombra gronda per ina ulteriura lectura.